

# La varianta mini n'ha persvadì nagin

Il cussegl grond na vul savair nagut dad ina cumprova per futuras ustieras ed ustiers

■ (anr/ac) Il deputà e president da Gastro Grischun, Franz Sepp Caluori (pcd, Cuira), nun ha pudì persvader il cussegl grond da la necessitad dad introducir in varianta redimensiunada dad ina lubientscha da far ustier en il chantun Grischun. Bliers deputads han resentì sia incumbensa sco sfurzim.

Ins po sperar ch'il deputà Franz Sepp Caluori (pcd, Cuira) n'haja betg gi tanta fadia da chattar ina partenaria sco da persvader il cussegl grond da la necessitad dad introducir ina sort patenta d'ustier. Gia avant dus onns ha el fatg naufragi en il cussegl grond cun sia idea da reintrodur in ina patenta d'ustiers en il chantun Grischun. La varianta redimensiunada stada en discussiun il mardi passà en il cussegl grond è vegnida titulada da pliras varts sco sfurzim. Caluori ha pli gugent discursà da perseveranza e tratg in paregl cun la tschertga dad ina partenaria. Era là saja la perseveranza dumandada suenter ina emprima terrada. Sustegn en il plenum per sia idea dad introducir ina cumprova per futuras ustieras ed ustiers n'ha il deputà e president da Gastro Grischun chattà nagin. Gist da la vart da la fracziun liberaldemocratica è vegnida la pli ferma opposiziun. La presidenta da la fracziun liberaldemocratica, la deputada Vera Stiffeler, (pld, Tavau), ha renfatschà a Caluori da survir cun sia incumbensa Brustgas al cussegl grond suenter ch'i nun saja reussì ad el da persvader avant dus onns cun paunins. I na dettia insumma nagins arguments per introducir ina cumprova che pretendia enconuschientschas da la igiena da victualias e da la prevenziun da dependenza da futuras ustieras ed ustiers.

Intervenziuns en ina fiera che funcziunia sajan da refusar. Per refusar ha er il deputà Lorenz Alig (pld, Foppa) pledà e fatg attent ch'ina tala mesira pretendida dal president da Gastro Grischun na levgieschia betg la tschertga dad ustieras ed ustiers en vitgs muntagnards. I sappia bain esser che tsherts manaschis hajan fadia cun la igiena, dentant sajan quai era manaschis timunads da persunas en possess dad ina patenta dad ustier.

## Las controllas actualas bastan

Plirs votums han fatg attent a las controllas d'igiena exequidas da l'Uffizi chantunal per la segirezza da victualias. Ch'il chantun Grischun n'haja betg in problem cun la igiena en la gastronomia ha schizunt Caluori confermà. E da quel avis è medemamain la regenza grischuna.

Ma er il svilup dal consum dad alcohol na saja betg in argument per ina cumprova, ha il deputà Andri Perl (ps, Cuira) explitgà. Il consum tschessia numnadain dapi onns. La regenza grischuna è dentant stada dal maini dad approvar l'incumbensa dal president da Gastro Grischun. Il cusseglier guvernativ, Jon Domenic Parolini, ha senti sin fundament dals votums che l'incumbensa Caluori nun haja ina schanza en il cussegl grond. El ha menziunà plirs chantuns ch'enconuschian ina tala cumprova sco pretendida da Caluori. La scolaziun pretendida dad ina enfin duas emnas sappia senz'auter augmentar la igiena en la gastronomia, ha argumentà il cusseglier guvernativ. Il cussegl grond è cleramain stà dad in'otra opiniun ed ha refusà l'incumbensa cun 70 vers 35 vuschs.



Il president da Gastro Grischun, il deputà Franz Sepp Caluori, ha fatg naufragi en il cussegl grond gia per la segunda giada cun sia pretensiun per ina cumprova per futuras ustieras ed ustiers.